

Contratista lo cuminsa traha bek riba Caya Grandi dia 13 di januari

ORANJESTAD - Aña pasa e proyecto di Caya Grandi lo mester a keda cla, pero ainda esaki no ta completamente cla. Ainda tin algun puntonan cu mester wordo termina, pa asina tur hende por disfruta di esaki. Den luna di december esaki tabata habri tanto pa e comerciantenan por a bende mas miho, pero tambe pa e clientenan cu por a disfruta di Caya Grandi sin cu mester a topa cu caminda kibra. Pa e Caya Grandi por bay pa basta tempo sin cu mester bolbe pasa den un proyecto asina grandi, mester zorg pa e mantencion.

E contratista ainda ta cu vakantie di cual nan lo cuminsa traha dia 13 di januari proximo. Esaki ta significa trabounan di preparatorio aworaki ta cuminsa unda cu Dienst Openbare Werken (DOW) ayera a reuni interno ariba e proyecto, y despues nan lo tene reunion cu gerencia di e contratista pa mira con lo termina cu e proyecto hunto, segun sr. Marlon Croes, director interino di DOW. Tambe nan lo mester mira con pa sigui cu e proyecto pa dia 13 di januari proximo. Te cu awo DOW ta analisando con cos ta bay-



endo pa asina determina pa ki fecha e proyecto lo keda completamente cla.

PLAN DI EHECUCION

Tur e dianan aki awa a yobe y hendenan a bishita Caya Grandi den december, e pregunta ta si DOW y e contratista a haci un analisis con tur cos a bay, pa mira si tin caminda mester a haci algun ahustacion. Segun sr. Croes, den e plan ora di a traha e

proyecto riba computer, y tin cierto cosnan cu kier yega, e plan di ehecucion tabata pa mira con comunidad, hende, of turista ta comporta nan mes den e plan na momento di implementa esaki.

Ora di implementa esaki lo haya cierto puntonan, unda cu lo mester mehora. Algun di e puntonan aki DOW a reconoce nan caba, di cual nan lo bay coregi den e proximo lunanan cu ta na caminda.

MANTENCION DI CAYA GRANDI

Hopi hende ta puntra nan mes ken lo ta responsabel pa cu e mantencion di Caya Grandi awo cu e keda cla. Segun e director interino di DOW, normalmente ora cu un trabou grandi manera di Caya Grandi of cualkier otro wordo entrega completamente cla, e tin un periodo dependiendo di e infraestructura. Por

ehempel si ta klinkers, esaki tin seis luna di mantencion door di e contratista. Ora tin mapa di esaki, e contratista mester duna 1 aña di garantia di periodo di mantencion.

Na momento cu fiha e fecha, e periodo di mantencion di parti civil tin cu tuma luga pa e contratista. Loke ta encera e matanan, pa e proximo aña esaki tambe lo mester wordo manteni door di e contratista. Despues esaki lo cay bou encargo di e gobierno.

Den e caso aki DOW ta conoci como e departamento cu ta mantene infraestructura di Aruba, pero loke ta trata especificamente Caya Grandi lo mester tin un prioridad den mantencion y uzo. Esey kiermen cu gobierno ta lanta un identidad completamente nobo. Esaki lo wordo forma pa sector priva y publico.

E body aki lo bay regula pa e mantencion di Caya Grandi lo tuma luga, wak pa e limpieza y e seguridad di e luga wordo manteni. Stimula e comerciantenan pa haci miho uzo di e edificionan, pa por haya un miho Caya Grandi. Aña pasa a pone mata, klinker, rails, y mucho mas den Caya Grandi, pero pa esaki mustra bibo mester mantene. □